



**TERENGGANU DARUL IMAN**

**TAMBAHAN PERUNDANGAN**

**AKTA KERAJAAN TEMPATAN 1976**

**Tr. P.U. 4/87**

**UNDANG-UNDANG KECIL (KEBERSIHAN AWAM) MAJLIS DAERAH DUNGUN 1986**

Tarikh penyiaran :

9 April 1987

Tarikh mula berkuatkuasa :

1 Januari 1987

---

**SUSUNAN UNDANG-UNDANG KECIL**

---

Mukadimah

- Undang-undang kecil 1. Nama dan mula berkuatkuasa.
- Undang-undang kecil 2. Tafsiran.
- Undang-undang kecil 3. Meletak sampah-sarap di atas lebu.
- Undang-undang kecil 4. Sampah-sarap tempat kediaman.
- Undang-undang kecil 5. Saluran sampah-sarap.
- Undang-undang kecil 6. Menggali dari bekas sampah-sarap.
- Undang-undang kecil 7. Bekas menyimpan sampah-sarap awam.
- Undang-undang kecil 8. Sampah-sarap yang dilarang.
- Undang-undang kecil 9. Sistem pengaliran
- Undang-undang kecil 10. Menggali tempat membuang sampah.
- Undang-undang kecil 11. Mengguna tempat membuang sampah Majlis.
- Undang-undang kecil 12. Pencemaran sungai dan lain2.
- Undang-undang kecil 13. Pengotoran.
- Undang-undang kecil 14. Tumpahan.
- Undang-undang kecil 15. Anggapan undang-undang.
- Undang-undang kecil 16. Halangan parit, Kacau ganggu dll.
- Undang-undang kecil 17. Muatan dari kenderaan.

Undang-undang kecil 18. Menguruskan bangkai.  
Undang-undang kecil 19. Meletak mayat di atas lebuah dll.  
Undang-undang kecil 20. Pengalihan runtuh.  
Undang-undang kecil 21. Memasang tali dll. di jalan awam.  
Undang-undang kecil 22. Bermain layang-layang.  
Undang-undang kecil 23. Pagar pohon perlu dipotong dan dipangkas.  
Undang-undang kecil 24. Alat keselamatan lebuah tidak boleh dialih.  
Undang-undang kecil 25. Halangan.  
Undang-undang kecil 26. Kereta lembu dan kerbau.  
Undang-undang kecil 27. Pengumpulan binatang.  
Undang-undang kecil 28. Benda-benda tidak boleh diletak di atas jalan awam dll.  
Undang-undang kecil 29. Benda-benda tidak boleh dijemur di atas jalan awam.  
Undang-undang kecil 30. Bangkai binatang.  
Undang-undang kecil 31. Pembinaan longkang di jalan awam dll.  
Undang-undang kecil 32. Pelekat tidak boleh ditampal tanpa kebenaran.  
Undang-undang kecil 33. Pengalihan najis.  
Undang-undang kecil 34. Mandi, membasuh pakaian dan kenderaan di tempat awam.  
Undang-undang kecil 35. Pengkhianatan.  
Undang-undang kecil 36. Air dari tempat kemudahan awam.  
Undang-undang kecil 37. Binatang disepanjang lebuah dll.  
Undang-undang kecil 38. Pengalihan benda yang mengeluarkan bau busuk.  
Undang-undang kecil 39. Orang yang mengalih benda yang mengeluarkan bau busuk.  
Undang-undang kecil 40. Penalti.  
Undang-undang kecil 41. Bayaran.  
Undang-undang kecil 42. Pemberhentian pemakaian undang-undang kecil 170 hingga 184 Undang-undang Kecil Jumaah Bandaran Terengganu.

## JADUAL

## **Mukadimah**

PADA menjalankan kuasa-kuasa yang diberi oleh seksyen-seksyen 73 dan 102 Akta Kerajaan Tempatan 1976 [Akta 171], Majlis Daerah Dungun dengan ini membuat dan menurut seksyen 103 Akta ini, Pihak berkuasa Negeri dengan ini mengesahkan Undang-undang Kecil yang berikut:

### **1. Nama dan mula berkuatkuasa.**

(1) Undang-undang kecil ini bolehlah dinamakan **Undang-undang Kecil (Kebersihan Awam) Majlis Daerah Dungun, 1986** dan hendaklah mula berkuatkuasa pada 1 haribulan Januari 1987.

### **2. Tafsiran**

Dalam undang-undang kecil ini, melainkan jika kandungan ayatnya menghendaki makna yang lain –

“lebu” termasuklah sesuatu jalan, medan, siar-kaki, jalan lalu atau jalan susur, sama ada jalan tembus atau tidak, di atas mana orang ramai berhak lalu dan juga jalan di atas sesuatu jambatan, dan juga termasuklah sesuatu jalan, siar-kaki atau jalan lalu, halaman terbuka atau jalan kecil terbuka, yang digunakan atau dicadang untuk digunakan sebagai suatu jalan masuk kepada dua buah pegangan atau lebih, sama ada orang ramai berhak lalu di atasnya atau tidak, dan semua saluran parit dan longkang di sisi mana-mana lebu hendaklah disifatkan sebagai sebahagian daripada lebu itu;

“jalan awam” ertinya mana-mana jalan dimana orang awam mempunyai hak melaluinya yang mana orang awam mempunyai hak melaluinya yang mana atau yang selalu dibaiki atau dijaga oleh Majlis atau yang telah diberi atau yang telah diletak hak kepadanya di bawah mana-mana undang-undang berkuatkuasa pada masa itu atau dengan apa-apa cara yang lain;

“kemudahan awam” ertinya tandas-tandas, tandas kencing, tandas tarik, tempat basuh tangan, tangki air, tempat mandi yang akan diisytiharkan oleh Majlis dari masa ke semasa;

“Majlis” ertinya Majlis Daerah Dungun;

“premis” termasuklah rumah kediaman, bangunan, tanah, esamen, mana-mana hak milik turun temurun, sama ada terbuka atau tertutup, sama ada dibina di atasnya atau

tidak, sama ada yang awam atau persendirian dan sama ada dijaga atau tidak oleh Pihak Berkuasa;

“siar-kaki” ertinya termasuk kaki-lima, jalan-jalan dan beranda di tepi-tepi jalan;

“sampah-sarap kandang” ertinya najis atau air kencing kuda, biri-biri, kambing, kerbau, lembu atau babi dan kotoran atau sampah sarap atau pengaliran dari mana-mana kandang, atau bangsal kerbau lembu atau tempat-tempat memelihara biri-biri, kambing, kerbau, lembu, babi, ternakan-ternakan atau mana-mana binatang lain;

“sampah sarap kebun” ertinya sampah-sarap dari kebun dan aktiviti pertanian;

“sampah-sarap perdagangan” ertinya sampah-sarap mana-mana perdagangan, pengeluaran atau perniagaan atau dari apa-apa kendalian bangunan;

“sampah-sarap tempat kediaman” ertinya sampah-sarap yang terjadi akibat dari aktiviti rumahtangga dan tidak termasuk ‘sampah-sarap perdagangan’, ‘sampah-sarap kebun’ atau sampah-sarap kandang;

“bekas penyimpan sampah-sarap awam” ertinya bekas sampah-sarap yang dibekalkan oleh Majlis untuk tujuan meletakkan sampah-sarap oleh pekerja Majlis;

“bekas penyimpan sampah-sarap rumah kediaman” ertinya bekas penyimpan sampah-sarap yang dibekalkan oleh tuan rumah untuk tujuan meletakkan sampah-sarap tempat kediaman;

Perkataan-perkataan “Tempat Awam”, “Pegawai Kesihatan”, “Yang Dipertua” hendaklah mempunyai makna yang sama seperti yang diertikan dibawah seksyen 2, Akta Kerajaan Tempatan, 1976 [*Akta 171*].

### **3. Meletak sampah-sarap diatas lebu.**

Tiada sampah-sarap, kotoran, atau apa-apa benda boleh diletak di atas lebu, jalan atau tempat awam kecuali mengikut cara yang diperuntukkan selepas daripada ini.

### **4. Sampah-sarap tempat kediaman.**

(1) Setiap penghuni mana-mana premis hendaklah mengadakan sebilangan yang cukup akan bekas menyimpan sampah-sarap yang bertutup, untuk menyimpan sampah-sarap dari premis. Bekas ini hendaklah diperbuat dari apa-apa bahan dan berukuran sebagaimana yang dibenarkan oleh Pegawai Kesihatan.

(2) Semua sampah-sarap dari premis yang telah terlebih dahulu diisikan ke dalam sarung plastik dan diikatkan dengan sempurna, hendaklah diletakkan ke dalam bekas sampah-sarap dan bekas ini hendaklah diletak, sama ada di sisi premis atau di tepi kaki lima atau di pintu pagar premis atau disuatu tempat yang sesuai atau di ruang sampah-sarap seperti yang dikehendaki oleh Majlis supaya ianya boleh dikosongkan oleh pekerja Majlis. Di mana saluran sampah-sarap dibekalkan, sampah-sarap itu hendaklah diletakkan ke dalam saluran itu.

#### **5. Saluran sampah-sarap.**

Majlis boleh mengkehendaki pemunya mana-mana bangunan yang lebih dari satu tingkat menyediakan dengan secukupnya saluran sampah-sarap, alat dan ruang untuk sampah-sarap yang sesuai ukurannya.

#### **6. Menggali dari bekas sampah-sarap.**

Tiada seorang pun yang tidak diberi kebenaran boleh mencakar atau menggali di dalam atau mengalih apa-apa daripada atau menumpah atau menyelerakkan atau membiarkan terdedah mana-mana kandungan mana-mana bekas sampah persendirian yang diletak di mana-mana beranda atau mana-mana muka pintu atau pintu pagar atau mana-mana lebuah atau jalan belakang.

#### **7. Bekas penyimpan sampah-sarap.**

Majlis boleh menyebabkan diadakan tempat yang sesuai dan selesa seberapa banyak bekas penyimpan sampah-sarap yang boleh dialih atau yang kekal di mana di dalamnya debu, kotoran, abu dan sampah yang dipungut oleh kenderaannya daripada bekas penyimpan sampah-sarap tempat kediaman boleh diletak secara sementara.

#### **8. Sampah-sarap yang dilarang**

Tiada seorang boleh meletakkan najis, tahi atau sampah-sarap kebun atau kandang atau bangkai atau mayat di dalam bekas penyimpan sampah-sarap tempat kediaman atau awam.

## **9. Sistem pengaliran**

Majlis boleh pada bila-bila masa mengenakan untuk semua premis di dalam sesuatu kawasan atau kawasan-kawasan yang dari masa ke semasa dinyatakan olehnya untuk tujuan ini mana-mana system yang difikirkan munasabah olehnya untuk memungut dan mengalih oleh Majlis najis, debu, kotoran, abu, sampah-sarap, sisa-sisa dan lain-lain sampah-sarap dari premis-premis ini dan boleh menentukan bayaran-bayaran yang dikenakan berkaitan dengan pungutan dan pengalihan itu.

## **10. Menggali tempat membuang sampah.**

Tiada seorang pun yang tidak diberi kebenaran boleh mencakar atau menggali di dalam atau mengalih apa-apa sahaja benda dari sampah-sarap yang ditempatkan di di dalam man-mana tempat membuang sampah Majlis.

## **11. Mengguna tempat membuang sampah Majlis.**

Tiada seorang pun yang tidak diberi kebenaran boleh meletakkan apa-apa di dalam atau mana-mana tempat membuang sampah Majlis.

## **12. Pencemaran sungai dan lain-lain.**

Tiada seorang pun boleh merendam atau membasuh atau membenar pekerjaanya atau anggota rumahnya di bawah kawalannya merendam atau membasuh di dalam mana-mana sungai, terusan, tangki awam, longkang, parit atau anak sungai mana-mana kulit haiwan, pakaian yang bercelup atau lain-lain bahan yang berkemungkinan menjadi air sungai, terusan, longkang, parit atau alurair itu berbau busuk atau merbahaya dan tiada seorang pun boleh tanpa kebenaran Pegawai Kesihatan secara bertulis memniarkan mana-mana air di mana di dalamnya kulit binatang, pakaian yang bercelup atau benda-benda lain yang telah direndam atau dibasuh mengalir atau menyalur ke dalam mana-mana sungai, terusan, tangki awam, longkang, parit atau alur-alur.

### **13. Pengotoran.**

Tiada seorang boleh meletakkan atau membenarkan pekerja atau anggota rumahnya di bawah kawalannya meletakkan mana-mana tanah, habuk kayu, najis, air kencing, sampah-sarap kebun, kotoran atau apa-apa jenis bahan di atas mana-mana lebuah tempat awam atau lorong belakang, ke dalam mana-mana longkang atau ke dalam atau di atas kawasan lapang atau tanah di mana orang awam boleh melaluinya atau ke dalam atau di atas tebing mana-mana sungai, terusan, alurair atau ke dalam atau ke atas pantai.

### **14. Tumpahan.**

Tiada seorang pun boleh menumpahkan atau menyebabkan tumpahan atau membenarkan pekerjaanya menumpahkan mana-mana tanah, pasir, batu kotoran atau apa-apa benda ke atas mana-mana lebuhan dari mana-mana bahagian kenderaan di bawah kawalannya.

### **15. Anggapan undang-undang.**

Untuk tujuan Undang-Undang Kecil ini pemunya atau penghuni premis atau majikan di dalam hal pekerja atau tuan punya di dalam hal kenderaan hendaklah dianggap sebagai telah membenarkan atau menyebabkan melakukan kesalahan jika kesalahan-kesalahan itu dilakukan oleh pekerja atau ahli rumahnya di bawah kawalannya atau oleh kenderaannya.

### **16. Halangan parit, kacauganggu dll.**

(1) Tiada seorang pun boleh menghalang mana-mana parit awam atau membina apa-apa tangga, jambatan atau titian merintang mana-mana parit awam, kali atau terusan tanpa kebenaran bertulis Majlis dan mengikut arahan Majlis.

(2) Tiada seorang pun boleh membuat kacauganggu dengan membuang najisnya di atas atau merintang mana-mana lebuah, lorong belakang, kaki-lima, jalan kaki, tepi jalan kedai atau di atas mana-mana tanah atau kawasan lapang di mana orang awam boleh melaluinya atau ke dalam atau di atas tebing mana-mana sungai, terusan, parit, tepian pantai atau alur air atau membenarkan mana-mana kanak-kanak di bawah umur 12 tahun ke bawah jagaannya atau kawalannya melakukan kacauganggu ini.

(3) Untuk tujuan Undang-Undang Kecil ini seseorang yang mempunyai jagaan atau kawalan kanak-kanak itu hendaklah dianggap telah membenarkan kanak-kanak itu melakukan kesalahan bila mana kanak-kanak itu melakukan kesalahan ini.

#### **17. Muatan dari kenderaan**

Tiada seorang pun boleh memandu mana0mana kenderaan yang membawa batu, bahan yang berat, tanah, batu-bata atau apa-pa bahan yang lain tanpa mengambil langkah yang wajar menghalang benda-benda ini dari jatuh ke atas lebu.

#### **18. Menguruskan bangkai.**

Setiap pemunya atau penghuni di dalam kawasan di mana tanah atau premisnya terdapat mana-mana binatang yang mati hendaklah dengan perbelanjaannya sendiri dalam masa empat jam selepas kematiannya atau jika kematiannya berlaku pada malam hari dalam masa empat jam selepas siang, mengalih dan menanam bangkai itu atau mengaturnya untuk Majlis menguruskannya dan mana-mana perbelanjaan bagi maksud itu hendaklah diperolehi daripada pemunya atau penghuni.

#### **19. Meletak mayat di atas lebu dll.**

Tiada seorang pun boleh meletakkan atau menyebabkan terletaknya mana-mana mayat atau bangkai atau mana-mana bahagian mayat atau bangkai di atas mana-mana lebu tempat awam atau lorong belakang atau ke dalam mana-mana parit, sungai atau alurair atau di atas tebing mana-mana sungai, alurair atau terusan di dalam Majlis atau di tepi pantai.

#### **20. Pengalihan runtuh.**

Jika mana-mana rumah, tembok, beranda atau bahagian mana-mana rumah, pokok atau apa-apa jenis runtuh jatuh di atas mana-mana jalan awam, tempat awam atau lorong belakang, tuan punya rumah, tembok atau bahagian mana-mana premis itu hendaklah dengan serta-merta mengalih benda yang jatuh itu dan jika pemunya



mengabaikannya Majlis boleh mengalihkannya dan apa-apa perbelanjaan yang dibelanjakan oleh kerana itu hendaklah dibayar oleh pemunya.

#### **21. Memasang tali dll. di jalan awam.**

Tiada seorang pun boleh meletakkan apa-apa tali, wayer, kertas tebal atau tiang merintang mana-mana lebu, tempat awam atau lorong belakang tanpa kebenaran bertulis dari Majlis.

#### **22. Bermain layang-layang.**

Tiada seorang pun boleh di mana-mana lebu atau lorong belakang bermain layang-layang.

#### **23. Pagar pohon perlu dipotong atau dipangkas.**

Penghuni atau jika didiami pemunya mana-mana tanah di mana di atasnya ada pagar pohon yang bersempadan mana-mana lebu di dalam kawasan Majlis hendaklah menjaga pagar pohon itu dengan dipotong dan dipangkas supaya tidak menghalang lebu dan di dalam keadaan di mana penghuni atau pemunya itu gagal mematuhi notis bertulis dari Majlis yang telah disampaikan kepadanya, Majlis boleh menyebabkan pagar pohon itu dipotong, dipangkas dan dibuang potongan-potongan itu dan boleh menuntut perbelanjaan oleh kerana itu dari penghuni atau pemunya.

#### **24. Alat keselamatan lebu tidak boleh dialih.**

Tiada seorang pun boleh membawa turun, mengganggu, meminda atau mengalih apa-apa notis, pagar sekatan, rantai atau tiang atau memadamkan atau mengalih atau mengganggu mana-mana lampu yang diletak di mana-mana lebu, tempat awam atau lorong belakang untuk tujuan keselamatan atau kesenangan awam mencegah atau mengawal laluan orang berjalan kaki, basikal, kenderaan atau binatang, semasa mana-mana lebu, tempat awam atau lorong belakang sedang memerlukan pembaikan atau semasa apa-apa kerja lain sedang dijalankan oleh atau di bawah perintah Majlis.

## **25. Halangan**

Tiada seorang pun boleh di atas mana-mana lebu, tempat awam atau lorong belakang atau mana-mana bahagiannya meletak atau meninggalkan apa-apa benda atau barang apa pun yang berkemungkinan menyebabkan penghalangan atau meletakkan mana-mana biadai, kajang atau lain-lain anjuran merintang tanpa kebenaran bertulis dari Majlis dan di mana kebenaran itu diberi alat-alat itu hendaklah dijaga dengan bersih, dalam keadaan baik dan dijaga dengan sempurna.

## **26. Kereta lembu atau kerbau**

Setiap pembawa kereta lembu atau kerbau yang mempunyai kawalan keatasnya hendaklah membawa sebuah bakul dan dengan cara ini mengambil semua langkah yang munasabah menghalang peninggalan najis di atas jalan awam.

## **27. Pengumpulan binatang.**

Tiada seorang pun boleh mengumpul binatang atau meninggalkan apa-apa kereta atau mengadakan perkhemahan di atas mana-mana lebu atau tempat awam tanpa kebenaran bertulis Majlis dan mengikut arahan-arrahannya.

## **28. Benda-benda tidak boleh diletak di atas jalan awam dll.**

Tiada seorang pun boleh dengan sendirinya atau ejennya atau pekerjanya meletakkan atau menyebabkan diletakkan apa-apa habuk kayu, ikan kering, sirip-yu, *beche-de-mer*, tepung, udang, belacan, buah pinang atau apa-apa barang lain yang berkemungkinan menyebabkan penghalangan di atas mana-mana lebu, tempat awam, lorong belakang, kaki lima, jalan tepi kedai, di atas kawasan lapang di mana orang awam melaluinya atau ke dalam mana-mana parit. Mana-mana barang yang diletakkan sedemikian atau menyebabkan diletakkan sedemikian boleh dialih dan dimusnahkan oleh Majlis tanpa merujuknya kepada pemunya.

### **29. Benda-benda tidak boleh dijemur di atas jalan awam.**

Tiada seorang pun boleh, dengan sendirinya atau ejennya atau pekerjanya menjemur atau menggantung atau meletak untuk tujuan menjemur apa-apa kain atau pakaian, perca kain, layer, kulit binatang, bulu burung, tulang-tulang, kayu api atau apa-apa benda lain di atas mana-mana pagar pohon, pagar, susuran tangga, pagar papan di sekeliling dinding atau bangunan awam atau kepunyaan Majlis atau di atas tebing mana-mana sungai, terusan, parit atau longkang atau di atas mana-mana lebu, kaki lima, jalan di tepi kedai atau lorong belakang atau di atas mana-mana tanah lapang di mana orang ramai dapat melaluinya.

### **30. Bangkai binatang.**

Tiada bangkai binatang boleh dipotong di atas mana-man lebu, tempat awam, atau lorong belakang.

### **31. Pembinaan longkang di jalan awam dll.**

Tiada seorang pun boleh membina apa-apa saluran atau membawa air melalui apa-apa saluran merintang laluan awam kecuali dengan cara yang terlebih dahulu mesti diluluskan oleh Majlis secara bertulis dan tiada seorang pun boleh mengubah mana-mana kali awam atau alir air di dalam kawasan Majlis untuk tujuan apa-apa pun tanpa kebenaran bertulis oleh Majlis terlebih dahulu.

### **32. Pelekat tidak boleh ditampal tanpa kebenaran.**

Tiada seorang pun boleh dengan sendirinya atau ejennya atau pekerjanya tanpa kebenaran bertulis Majlis terlebih dahulu menampal apa-apa iklan, pelekat, notis atau apa-apa kertas pada atau di mana-mana bangunan, tembok, pagar susur tangga, pagar pohon, taian atau pokok dengan kapur cat atau dengan apa cara sekali pun. Apa-apa tambahan yang tidak dibenarkan, kerosakan atau tanda boleh dialih oleh Majlis dan perbelanjaan yang dikenakan oleh kerananya hendaklah dibayar oleh orang yang telah ingkar itu.

### **33. Pengalihan najis.**

(1) Tiada seorang pun selain dari pekerja yang dibenarkan atau ejen Majlis boleh tanpa kebenaran bertulis Majlis terlebih dahulu mengalih najis dari mana-mana tandas yang terletak di dalam kawasan di mana system pengalihan najis dipakai oleh majlis.

#### **Tandas.**

(2) Pemunya mana-mana tandas hendaklah, jika dikehendaki oleh Pegawai Kesihatan membina dan mengatur semula tandas itu sehingga memuaskan hati pegawai Kesihatan.

(3) Penghuni sesebuah rumah hendaklah, jika dikehendaki secara bertulis oleh Pegawai Kesihatan, mengadakan atau membaharui baldi tandas dan alat-alat yang lain yang ukuran, bentuk dan bahan seperti yang dinyatakan oleh Pegawai Kesihatan.

Tandas, baldi dan bahan-bahan yang lain boleh disediakan atau diperbaharui oleh Majlis dengan perbelanjaan penghuni yang dibekalkan bila penghuni itu telah gagal untuk menyediakan atau membaharuinya di dalam tempoh yang ditentukan oleh Pegawai Kesihatan secara bertulis.

(4) Kemasukan secara bebas hendaklah dibenarkan ke setiap rumah dan bangunan di dalam kawasan pengalihan najis kepada ejen-ejen dan pekerja-pekerja Majlis untuk tujuan memungut dan mengalih najis di anantara jam 6.00 pagi hingga 6.00 petang.

### **34. Mandi, membasuh pakaian dan kenderaan di tempat awam.**

(1) Tiada seorang pun boleh menggunakan mana-mana tempat kemudahan awam untuk tujuan membasuh pakaian dan kenderaan.

(2) Tiada seorang pun boleh mandi di dalam tempat kemudahan awam kecuali di tempat mandi yang dikhaskan untuk tujuan itu.

### **35. Pengkhianatan.**

Tiada seorang pun boleh merosakkan atau membuat apa-apa perubahan terhadap bangunan, alat-alat atau paip air di dalam mana-mana tempat kemudahan awam atau mencuri darinya apa-apa yang menjadi sebahagian daripada kemudahan itu.

### **36. Air dari tempat kemudahan awam.**

Tiada seorang pun yang tidak diberi kebenaran boleh mengambil air untuk apa-apa tujuan sekalipun dari mana-mana tempat kemudahan awam.

### **37. Binatang disepanjang lebuah dll.**

Sesiapa yang menjadi pemunya atau orang yang mempunyai kawalan ke atas mana-mana lembu, kerbau, keldai, biri-biri, kambing atau babi membenarkan binatang itu berada di atas mana-mana lebuah di dalam had kawasan Majlis atau membawa atau menyebabkan dibawa mana-mana lebuah atau mana-mana tempat awam atau harta persendirian di dalam kawasan Majlis adalah bersalah melakukan satu kesalahan di bawah Undang-Undang Kecil ini.

### **38. Pengalihan benda yang mengeluarkan bau busuk.**

Tiada najis, air kencing, ikan yang reput, bahan binatang yang busuk atau beras yang reput atau benda-benda lain yang mengeluarkan bau busuk boleh dibawa sepanjang atau di atas mana-mana lebuah di dalam kawasan Majlis melainkan di dalam bekas yang kedap udara dan kedap air yang diluluskan oleh Majlis.

### **39. Orang yang mengalih benda yang mengeluarkan bau busuk.**

Setiap orang yang mengalih mana-mana benda yang mengeluarkan bau busuk hendaklah menyediakan bekas itu dengan perbelanjaan mereka sendiri. Tiada bekas itu yang mengandungi benda yang mengeluarkan bau busuk itu boleh dibawa melalui, di sepanjang atau di atas mana-mana lebuah di dalam kawasan Majlis kecuali bekas itu

dikedap air dan bebas dari lubang-lubang dari mana kandungannya atau bau busuk boleh terlepas keluar dan kecuali penutup bekas itu ditutup dengan sempurna.

#### **40. Penalti.**

Seseorang yang melanggar mana-mana Undang-Undang Kecil ini adalah bersalah atas suatu kesalahan dan apabila disabitkan boleh dikenakan denda tidak lebih daripada dua ribu ringgit atau penjara selama tempoh tidak lebih daripada satu tahun atau denda dan penjara itu kedua-duanya dan mengenai sesuatu kesalahan yang berterusan boleh dikenakan denda tidak lebih daripada dua ratus ringgit bagi tiap-tiap satu hari selama tempoh kesalahan itu diteruskan selepas sabitan.

#### **41. Bayaran.**

(1) Bayaran untuk mengalih sampah-sarap tempat kediaman sampah-sarap perdagangan, sampah-sarap kebun atau sampah-sarap kandang atau untuk meletakkan apa-apa benda di dalam atau di atas mana-mana tempat pembuangan sampah Majlis atau menghisap najis hendaklah seperti di dalam jadual tetapi Majlis boleh memindanya dari masa ke semasa.

(2) Semua kutipan hendaklah menjadi sebahagian daripada Kumpulan Wang Majlis Daerah Dungun.

#### **42. Pemberhentian pemakaian undang-undang kecil 170 hingga 184 Undang-Undang Kecil Jumaah Bandaran, Terengganu.**

Undang-Undang Kecil 170 hingga 184 Undang-Undang Kecil Jumaah Bandaran, Terengganu adalah terhenti dipakai bagi kawasan Majlis.

## JADUAL

(Undang-Undang Kecil 41 (1))

1. Mengangkat sampah
  - (a) Kedai yang mempunyai keluasan kurang daripada 5.49 meter x 21.4 meter - \$ 5.00 sebulan
  - (b) Kedai yang mempunyai keluasan lebih daripada 5.49 meter x 21.4 meter - \$ 8.00 sebulan
  - (c) Rumah banglo dan berkembar - \$ 5.00 sebulan
  - (d) Rumah teres - \$ 3.00 sebulan
  - (e) Bangunan Perusahaan - \$ 10.00 sebulan
  - (f) Kompleks Perniagaan - \$ 30.00 sebulan
  - (g) Bangunan Hotel
    - (kurang dari 10 bilik) - \$ 15.00 sebulan
    - Tambahan tiap-tiap bilik - \$ 1.00 sebulan
  - (h) Tempat untuk lain-lain kegunaan - \$ 3.00 sebulan
  
2. Hisap Najis
  - (a) Bayaran Pemeriksaan - \$ 20.00
  - (b) Bayaran Hisap Najis - \$ 15.00  
(Dalam kawasan Majlis)
  - (c) Bayaran Hisap Najis - \$ 15.00 dan dikenakan bayaran perjalanan 20 sen  
(Di luar kawasan Majlis) tiap-tiap 1.61 kilometer.